

欽定古今圖書集成

曆象彙編歲功典



欽定古今圖書集成曆象彙編歲功典
第三十三卷目錄

季春部彙考

易經

澤天夬卦

詩經

小雅出車章

禮記

月令

爾雅

月陽

易通卦驗

太陽雲

素問

診要經終論篇

汲冢周書

時訓解

呂氏春秋

季夏紀音律篇

史記

律書

封禪書壽星祠注

漢書

律歷志

淮南子

天文訓

時則訓

六合

大戴禮記

夏小正

說文

辰月

晉書

樂志

梁元帝纂要

季春

齊民要術

三月事宜

隋書

禮儀志

唐書

禮樂志

農政全書

季春事宜

農事占候

遵生八牋

三月朔忌

三月事宜

三月事忌

賞心樂事

三月

本草綱目

采浮萍草

酌中志略

宮中三月

直隸志書

宛平縣

良鄉縣

香河縣

通州

昌平州

懷柔縣

房山縣

薊

州 永平府 清苑縣 雄縣 深澤縣 肅
寧縣 任丘縣 青縣 慶雲縣 饒陽縣
內丘縣 宣府鎮

山東志書 蒲臺縣 兗州府 城武縣 濟寧
州 丘縣

山西志書 太谷縣 孟縣 夏縣 隰州 黎
城縣 廣靈縣

河南志書 儀封縣 陳州 輝縣 鞏縣 信
陽州 固始縣

陝西志書 白水縣 岐山縣 平涼府

江南志書 高淳縣 長洲縣 常熟縣 嘉定
縣 崇明縣 松江府 無錫縣

懷寧縣 徽州府 休寧縣 巢縣

浙江志書 嘉興府 孝豐縣 紹興府 諸暨
縣 餘姚縣 蘭谿縣 常山縣

龍泉縣

江西志書 武寧縣 寧州 都昌縣 湖口縣
新城縣 廣昌縣 瀘溪縣 瑞

州府

湖廣志書 崇陽縣 雲夢縣 寶慶府 新田
縣 建安縣 仙遊縣 詔安縣 海澄

福建志書 始興縣 歸善縣 長樂縣 化州
縣

廣東志書 隆安縣

廣西志書 南安州 鶴慶府

雲南志書

歲功典第三十三卷

季春部彙考

易經

澤天夬卦



本義 夬決也陽決陰也二月之卦也

詩經

小雅出車章

春日遲遲

疏 季春之日遲遲然陽氣舒緩之時

禮記

月令

季春之月日在胃昏七星中日牽牛中其日甲乙其帝太皞其神句芒其蟲鱗其音角律中姑洗其數八其味酸其臭羶其祀戶祭先脾

陳注胃宿在酉大梁之次姑洗辰律長七寸九分寸

之一

桐始華田鼠化為鴽虹始見萍始生

陳注此記辰月之候

天子居青陽右个乘鸞路駕倉龍載青旂衣青衣服倉玉食麥與羊其器疏以達是月也天子乃薦鞠衣于先帝

陳注鞠衣衣色如鞠花之黃也先帝先代木德之君薦此衣於神坐以祈蠶事

命舟牧覆舟五覆五反乃告舟備具於天子焉天子始乘舟薦鮪于寢廟乃為麥祈實

陳注舟牧主乘舟之官五覆五反所以詳視其罅漏

古今圖書集成
傾側之處也因薦鮪并祈麥實

是月也生氣方盛陽氣發泄句者畢出萌者盡達不
可以內天子布德行惠命有司發倉廩賜貧窮振乏
絕開府庫出幣帛周天下勉諸侯聘名士禮賢者

陳注不可以內言當施散恩惠以順生道之宣泄不
宜吝嗇閉藏也在內則命有司奉行在外則勉諸
侯奉行皆天子之德惠也

是月也命司空曰時雨將降下水上騰循行國邑周
視原野修利隄防道達溝瀆開通道路毋有障塞田

獵罝罟羅網畢翳餒獸之藥毋出九門是月也命野

虞毋伐桑柘鳴鳩拂其羽戴勝降于桑具曲植籩筐

陳注野虞主田及山林之官曲薄也植槌也所以架

曲與籩筐者

后妃齊戒親東鄉躬桑禁婦女毋觀省婦使以勸蠶
事

陳注毋觀禁止婦女使不得爲容觀之飾也省婦使
減省其箴線縫製之事也

蠶事既登分繭稱絲效功以共郊廟之服毋有敢惰

陳注稱絲效功以多寡為功之上下

是月也命工師令百工審五庫之量金鐵皮革筋角齒羽箭幹脂膠丹漆母或不良百工咸理監工日號母悖于時母或作為淫巧以蕩上心

陳注五庫者金鐵為一庫皮革筋為一庫角齒為一

庫羽箭幹為一庫脂膠丹漆為一庫視諸物之善惡皆有舊法謂之量一說多寡之數也此時百工各理治其造作之事工師監臨之每日號令以二事為戒一是造作器物不得悖逆時序二是不為

淫巧

是月之末擇吉日大合樂天子乃帥三公九卿諸侯大夫親往視之是月也乃合累牛騰馬遊牝于牧犧牲駒犢舉書其數

陳注春陽既盛物皆產育合累繫之牛騰躍之馬使

牡者就牝

命國難九門磔攘以畢春氣

陳注裂牲謂之磔除禍謂之攘

季春行冬令則寒氣時發草木皆肅國有大恐行夏

令則民多疾疫時雨不降山陵不收行秋令則天多
沉陰淫雨蚤降兵革並起

陳 肅者枝葉減縮而急粟也不收謂無所成遂也

爾雅

月陽

三月為病

易通卦驗

太陽雲

穀雨太陽雲出張如車蓋

素問

診要經終論篇

三月四月天氣正方地氣定發人氣在脾

注 三月四月天地之氣正盛而人氣在脾辰巳二

月足太陰陽明之所主也

汲冢周書

時訓解

清明之日桐始華又五日田鼠化為鴽又五日虹始
見桐不華歲有大寒田鼠不化鴽國多貪殘虹不見

古今圖書集成
婦人苞亂穀雨之日萍始生又五日鳴鳩拂其羽又五日戴勝降于桑萍不生陰氣憤生鳴鳩不拂其羽國不治兵戴勝不降于桑政教不中

呂氏春秋

季夏紀音律篇

姑洗之月達道通路溝瀆修利申之此令嘉氣趣至

注姑洗三月也時雨將降故修利溝瀆順其陽德

故嘉喜之氣至

史記

律書

南至于氏氏者言萬物皆至也南至于亢亢者言萬物亢見也南至于角角者言萬物皆有枝格如角也三月也律中姑洗姑洗者言萬物洗生其於十二子爲辰辰者言萬物之娠也

封禪書壽星祠注

角亢在辰爲壽星三月之時萬物始生建于春氣布養各盡其性不罹災夭故壽

漢書

律歷志

姑洗洗絜也言陽氣洗物辜絜之也位於辰在三月

注孟康曰辜必也必使之絜也

淮南子

天文訓

清明加十五日斗指辰則穀雨音比姑洗

季春三月豐隆乃出以將其雨

注豐隆雷也

姑洗之數六十四主三月下生應鍾

太陰在午歲名曰敦牂歲星舍胃昴畢以三月與之
晨出東方氐房心為對

時則訓

季春之月招搖指辰昏七星中旦牽牛中其位東方
其日甲乙其蟲鱗其音角律中姑洗其數八其味酸
其臭羶其祀戶祭先脾桐始華田鼠化為鴽虹始見
萍始生天子衣青衣乘蒼龍服蒼玉建青旗食麥與
羊服八風水爨其燧火東宮御女青色衣青采鼓琴
瑟其兵矛其畜羊朝於青陽右个舟牧覆舟五覆五

反乃言具於天子焉天子始乘舟薦鮪於寢廟乃爲
麥祈實是月也生氣方盛陽氣發泄句者畢出萌者
盡達不可以內天子命有司發困倉助貧窮振乏絕
開府庫出幣帛使諸侯聘名士禮賢者命司空時雨
將降下水上騰循行國邑周視原野修利隄防導通
溝瀆達路除道從國始至境止田獵畢弋置罟羅罔
餒毒之藥毋出九門乃禁野虞毋伐桑柘鳴鳩奮其
羽戴鷩降於桑具撲曲筥筐后妃齋戒東鄉親桑省
婦使勸蠶事命五庫令百工審金鐵皮革筋角箭幹

脂膠丹漆無有不良擇下旬吉日大合樂致歡欣乃
合牦牛騰馬游牝於牧令國儺九門磔攘以畢春氣
行是月令甘雨至三旬季春行冬令則寒氣時發草
木皆肅國有大恐行夏令則民多疾疫時雨不降山
陵不登行秋令則天多沈陰淫雨早降兵革並起三
月官鄉其樹李

六合

季春與季秋爲合季春大出季秋大內故三月失政
九月不下霜

古今圖書集成
大戴禮記

夏小正

三月參則伏伏者非忘之辭也星無時而不見俄有
不見之時故曰伏云攝桑桑攝而記之急桑也委楊
楊則花而後記之犂羊羊有相還之時其類犂犂然
記變爾或曰犂羝也螿則鳴螿天螻也頒冰頒冰者
分冰以授大夫也采識識草也妾子始蠶先妾而後
子何也曰事有漸也言自卑事者始執養宮事執操
也養長也祈麥實麥實者五穀之先見者故急祈而

記之也越有小旱越于也記是時恆有小旱田鼠化
爲鴛鴦鶴也變而之善故盡其辭也鴛爲鼠變而之
不善故不盡其辭也拂桐芭拂也者拂也桐芭之時
也或曰言桐芭始生貌拂拂然也鳴鳩言始相命也
先鳴而後鳩何也鳩者鳴而後知其鳩也
說文

辰月

辰震也三月陽氣動雷電振民農時也

晉書

古今圖書集成
樂志

三月之辰名爲辰辰者震也謂時物盡震動而長也
三月之管名爲姑洗姑洗者姑枯也洗濯也謂物生
新潔洗除其枯改柯易葉也

梁元帝纂要

季春

三月季春亦曰暮春末春晚春

齊民要術

三月事宜

三月二日及上除採艾及柳絮是月也冬穀或盡椹
麥未熟乃順陽布德振贍窮乏務施九族自親者始
無或蘊財忍人之窮無或利名罄家繼富度入爲出
處厥中焉蠶農尚閒可利溝瀆葺治牆屋修門戶警
設守備以禦春饑草竊之寇是月盡夏至煖氣將盛
日烈曠燥利用漆油作諸日煎藥可糶黍買布

注絮止瘡痛

隋書

禮儀志

古今圖書集成
隋制季春晦讎磔牲于宮門及城四門以禳陰氣秋分前一日禳陽氣季冬傍磔大讎亦如之其牲每門各用羝羊及雄鷄一選俛子如後齊冬八隊二時讎則四隊問事十二人赤幘禱衣執皮鞭工人二十二二人其一人方相氏黃金四日蒙熊皮元衣朱裳其一人爲唱師著皮衣執棒鼓角各十有司預備雄鷄羝羊及酒于宮門爲坎未明鼓譟以入方相氏執戈揚楯周呼鼓譟而出合趣顯陽門分詣諸城門將出諸祝師執事預齎牲甸磔之于門酌酒禳祝舉牲并酒

埋之

唐書

禮樂志

皇后歲祀季春吉巳享先蠶遂以親桑散齋三日於後殿致齋一日於正寢一日於正殿前一日尚舍設御幄於正殿西序及室中俱東向致齋之日晝漏上水一刻尚儀版奏請中嚴尚服帥司仗布侍衛司賓引內命婦陪位六尚以下各服其服詣後殿奉迎尚儀版奏外辦上水二刻皇后服鈿釵禮衣結佩乘輿

出自西房華蓋警蹕皇后卽御坐六尚以下侍衛一刻頃尚儀前跪奏稱尚儀妾姓言請降就齋室皇后降坐乘輿入室散齋之日內侍帥內命婦之吉者使蠶於蠶室諸預享者皆齋前享三日尚舍直長設大次於外壝東門之內道北南向命婦及六尚以下次於其後俱南向守宮設外命婦次大長公主長公主公主以下於南壝之外道西三公夫人以下在其南重行異位東向北上陳饌幔於內壝東門之外道南北向前享二日太樂令設宮縣之樂於壇南內壝之

內諸女工各位於縣後右校爲采桑壇於壇南二十步所方三丈高五尺四出陛尚舍量施帷障於外壝之外四面開門其東門足容厭翟車前享一日內謁者設御位於壇之東南西向望瘞位於西南當瘞埽西向亞獻終獻位於內壝東門之內道南執事者位於其後重行異位西向北上典正位於壇下一位於東南西向一位於西南東向女史各陪其後司贊位於樂縣東北掌贊二人在南差退西面又設司贊掌贊位於埽埽西南東面南上典樂舉麾位於壇上南

古今圖書集成
禮典典
陛之西東向司樂位於北縣之間當壇北向內命婦
位於終獻之南絕位重行異位西向北上外命婦位
於中壝南門之外大長公主以下於道東東西當內
命婦差退太夫人以下於道西去道遠近如公主重
行異位相向北上又設御采桑位於壇上東向內命
婦采桑位於壇下當御位東南北向西上執御鉤筐
者位於內命婦之西少南西上內外命婦執鉤筐者
位各於其采桑位之後設門外位享官於東壝之外
道南從享內命婦於享官之東北面西上從享外命

婦於南壝之外道西如設次設酒尊之位於壇上東
南隅北向西上御洗於壇南陛東南亞獻之洗又於
東南俱北向幣筐於壇上尊坫之所晡後內謁者帥
其屬以尊坫罍洗筐羃入設於位升壇者自東陛享
日未明十五刻太官令帥宰人以鸞刀割牲祝史以
豆取毛血置於饌所遂烹牲五刻司設升設先蠶氏
神座於壇上北方南向前享一日金吾奏請外命婦
等應集壇所者聽夜行其應采桑者四人各有女侍
者進筐鉤載之而行其日未明四刻搥一鼓爲一嚴

二刻槌二鼓爲再嚴尚儀版奏請中嚴一刻槌三鼓爲三嚴司賓引內命婦入立於庭重行西面北上六尚以下詣室奉迎尚服負寶內僕進厭翟車於閣外尚儀版奏外辦馭者執轡皇后服鞠衣乘輿以出華蓋侍衛警蹕內命婦從出門皇后升車尚功進鉤司製進筐載之內命婦及六尚等乘車從諸翊駕之官皆乘馬駕動警蹕不鳴鼓角內命婦宮人以次從其日三刻尚儀及司醞帥其屬入實尊罍及幣太官令實諸籩豆簠簋俎等內謁者帥其屬詣廚奉饌入設

於饌幔內駕將至女相者引享官內典引引外命婦俱就門外位駕至大次門外迴車南向尚儀進車前跪奏稱尚儀妾姓言請降車皇后降車乘輿之大次華蓋繖扇尚儀以祝版進御署出奠於坵尚功司製進受鉤筐以退典贊引亞獻及從享內命婦俱就門外位司贊帥掌贊先入就位女相者引尚儀典正及女史祝史與女執尊罍筐幕者入自東門當壇南北向西上司贊曰再拜掌贊承傳尚儀以下皆再拜就位司樂帥女工人入典贊引亞獻終獻女相者引執

古今圖書集成
事者司賓引內命婦內典引引外命婦入就位皇后
停大次半刻頃司言引尚宮立於大次門外當門北
向尚儀版奏外辦皇后出次入自東門至版位西向
立尚宮曰再拜皇后再拜司贊曰衆官再拜在位者
皆再拜尚宮曰有司謹具請行事樂三成尚宮曰再
拜皇后再拜司贊曰衆官再拜在位者皆再拜壇上
尚儀跪取幣於篚興立於尊所皇后自壇南陞升北
面立尚儀奉幣東向進皇后受幣進北向跪奠於神
座少退再拜降自南陞復於位初內外命婦拜訖女

祝史奉毛血之豆立於內壝東門之外皇后已奠幣
乃奉毛血入升自南陞尚儀迎引於壇上進跪奠於
神座前皇后既升奠幣司膳出帥女進饌者奉饌陳
於內壝東門之外皇后既降復位司膳引饌入至階
女祝史跪徹毛血之豆降自東陞以出饌升自南陞
尚儀迎引於壇上設於神座前皇后詣壘洗尚儀跪
取匱興沃水司言跪取盤興承水皇后盥司言跪取
巾於筐進以悅受巾跪奠於篚乃取爵於篚興進受
爵尚儀酌壘水司言奉盤皇后洗爵司言授巾皆如

古今圖書集成
初皇后升自壇南陛詣酒尊尚儀贊酌醴齊進先蠶氏神座前北向跪奠爵興少退立尚儀持版進於神座之右東面跪讀祝文皇后再拜尚儀以爵酌上尊福酒西向進皇后再拜受爵跪祭酒啐酒奠爵興尚儀帥女進饌者持籩俎進神前三牲胙肉各置一俎又以籩取稷黍飯共置一籩尚儀以飯籩胙俎西向以次進皇后每受以授左右乃跪取爵遂飲卒爵興再拜降自南陛復於位初皇后獻將畢典贊引貴妃詣盥洗盥手洗爵自東陛升壇酌盎齊於象尊進神

座前北向跪奠爵興少退再拜尚儀以爵酌福酒進貴妃再拜受爵跪祭遂飲卒爵再拜降自東陛復位昭儀終獻如亞獻尚儀進神座前跪徹豆司贊曰賜胙掌唱曰衆官再拜在位者皆再拜尚宮曰再拜皇后再拜司贊曰衆官再拜在位者皆再拜尚宮請就望瘞位司贊帥掌贊就瘞埴西南位皇后至望瘞位西向立尚儀執篚進神座前取幣自北陛降壇西行詣瘞埴以幣置於埴司贊曰可瘞埴東西各四人實土半埴尚宮曰禮畢請就采桑位尚宮引皇后詣采

桑壇升自西階東向立初皇后將詣望瘞位司賓引
 內外命婦采桑者執鉤筐者皆就位內外命婦一品
各二人二品三
 從升皇后受鉤采桑典製以筐受之皇后采三條止
 尚功前受鉤典製以筐俱退皇后初采桑典製等各
 以鉤授內外命婦皇后采桑訖內外命婦以次采女
 史執筐者受之內外命婦一品采五條二品采九條
 止典製等受鉤與執筐者退復位司賓各引內外命
 婦采桑者以從至蠶室尚功以桑授蠶母蠶母切之

以授婕妤食蠶灑一簿止尚儀曰禮畢尚宮引皇后
 還大次內外命婦各還其次尚儀典正以下俱復執
 事位司贊曰再拜尚儀以下皆再拜出女工人以次
 出其祝版燔於齊所車駕還宮之明日內外命婦設
 會於正殿如元會之儀命曰勞酒
 農政全書

季春事宜

下子 苾菰宜穀
雨日 麻子

栽種 綠豆 茶宜陰
地 粟 穀 大豆宜上
旬 早

稻宜上 秫 稌 松 山藥 黃瓜 紫草

紅花 甘蔗 菱 早芝麻 雞頭 絲瓜兒宜社

日葵菜 薑 香菜 百合 石榴 地黃

梔子 藍 紫蘇 茭白 芋 綿花 瓠子

杏 菠菜宜月末 葫蘆 桑葚 紵麻

收藏 芥菜 桐花 毛羽衣物 清明醋 書畫

入焙中 次茶 又可栽茶宜陰地 諸般瓜宜初三日

或辰戌日 葫蘆宜清明日

移植 椒 茄秧 枸杞苗 蒲 百合 柚橘

橙 柑

接換 楊梅 橙 柑 棗 栗 柿 枇杷

雜事 犁秧田 梅上接杏 杏上接梅 埋楮樹

收菌 開溝 修牆 防雨 浸穀種 修蜜

農事占候

三月清明寒食前後有水而渾主高低田禾大熟四

時雨水調 穀雨日雨主魚生諺云一點雨一個魚

穀雨前一兩朝霜主大旱是日雨則魚生必主多

雨二麥紅腐不可食用 月內有暴雨謂之桃花水

古今圖書集成
則多梅雨無滂亦無乾雪不消則九月霜不降雷多
歲稔虹見九月米貴
遵生八牋

三月朔忌

三月朔忌風雨主多病

三月事宜

孝經緯曰清明後十五日斗指辰爲穀雨言雨生百
穀物生清淨明潔也律姑洗姑者故也洗者鮮也言
萬物去故而從新莫不鮮明之謂也纂要曰三月爲

蠶月

元樞經曰是月天道北行作事出行宜向北方吉

四時纂要曰是月三日取桃花片收之至七月七日
取烏雞血和塗面及身光白如玉

又曰是月二日收桃葉曬乾搗末并花水服一錢治
心痛

瑣碎錄曰是月採桃花未開藥陰乾與桑椹子和臘
月猪油塗禿瘡神效

又曰是月羊糞燒灰存性和輕粉麻油可擦惡瘡

古今圖書集成
山居四要曰清明前二日收螺螄浸水至清明日以螺水灑牆壁等處可絕蜒蚰

濟世仁術曰三月辰日以絹袋盛麪掛當風處中暑者以水調服

法天生意曰清明前一日採大蓼曬乾能治无痢用米飲調服一錢效

萬花谷曰是月二十日天倉開日宜入山修道

二十七日沐浴令人神无清爽

又云春盡採松花和白糖或蜜作餅不惟香味清甘

自有所益於人

本草曰是月上寅採甘菊苗名玉英六月上寅日採梗名容成九月上寅採花名金精十二月上寅採根名長生收四味爲末用成日煉蜜丸如桐子大每服一錢一日三服百日身輕潤澤一年髮白再黑二年齒落更生三年返老還童

齊人月令曰採何首烏赤白各半米泔水浸一宿同黑豆飯鍋上蒸熟曬乾去豆爲末或加茯苓三分之一煉蜜爲丸酒下一二錢百日後百疾皆除長年益

古今圖書集成
壽多子忌食猪肉魚鼈蘿蔔何首烏內有生如鳥獸
并山石形象極大者乃珍品也服之成仙

三月四月中採山谷內新長柏葉松針或花藥長三
四寸枝陰乾細搗爲末煉蜜爲丸如小豆大常用月
之朔望清晨燒香東向持藥八十一丸呪曰神仙真
藥體全自然服藥入腹益壽延年鹽湯或酒下服訖
忌食五辛若要長肌肉加大麻巨勝要心力壯健加
人參茯苓用七月七日露水和丸尤佳
又曰是月上辰日採枸杞四月上巳日服之松花酒

取糯米淘極淨每米一斗以神麴五兩和勻取松花
一升細碎蒸之絹袋盛以酒一升浸五日卽堪服任
意服之

千金方曰是月入大山背陰不見日月松脂採鍊而
餌之百日耐寒暑補益五臟

雲笈七籤曰三月六日沐浴令人無厄

又曰商陸如人形者殺伏尸去面黯黑益智不忘男
女五勞七傷婦人產中諸病右用麴十二斤米三斗
加天門冬末釀酒浸商陸六日齋戒服之顏色充滿

尸蟲俱殺耳目聰明令人不老通神

真誥曰是月十一日拔白十三日拔白末不生出初

一初十日拔白生黑

是月取百合根曬乾搗為麪服能益人取山藥去黑

皮焙曬作麪食大補虛弱健脾胃

靈寶經曰是月初六初七廿七日沐浴令人神爽無

厄

酉陽雜俎曰三月心星見辰出火禁烟插柳謂禳此

耳寒食有內傷之虞故令人作鞦韆蹴鞠之戲以動

盪之

養生仁術曰穀雨日採茶炒藏能治痰嗽及療百病

三月事忌

季春之月不宜用卯日卯時作事犯月建不吉

雲笈七籤曰是月勿久處濕地必招邪毒勿大汗勿

裸露三光下以招不祥勿發汗以養臟炁勿食陳菹

令人發瘡毒熱病勿食驢馬肉勿食獐鹿肉令人神

魂不安勿食韭

是月五日忌見一切生血宜齋戒

古今圖書集成
三月八日勿食芹菜恐病蛟龍瘕面青黃肚脹大如
妊服糖水吐出愈

月令忌曰勿食血并脾季月土旺在脾恐死燕投入
百一歌曰勿食魚鼈令人飲食不化神魂恍惚發宿
疾

本草曰勿食生葵勿食羊脯三月以後有蟲如馬尾
毒能殺人

風土記是月十六日廿七日忌遠行水陸不吉初一
十六日忌裁衣交易

千金方曰三月辰寅日勿食魚凶

又曰勿食鳥獸五臟勿食小蒜勿飲深泉

孫真人曰是月勿殺生以順天道勿食百草心黃花
菜

楊公忌初九日不宜問疾

法天生意云勿食鷄子終身昏亂

又云勿食大蒜亦不可嘗食奪炁力損心力

三月修養法

季春之月萬物發陳天地俱生陽熾陰伏宜臥早起

古今圖書集成
早以養臟炁時肝臟炁伏心當向旺宜益肝補腎以
順其時卦值夬夬者陽決陰也決而能和之意生炁
在寅坐臥宜向東北方

孫真人曰腎炁以息心炁漸臨木炁正旺宜減甘增
辛補精益炁慎避西風宜懶散形骸便宜安泰以順
天時

賞心樂事

三月

生朝家宴

曲水流觴

花院月丹

花院桃柳

寒食郊游

蒼寒堂西緋碧桃

滿霜亭北棣棠

碧宇觀筍

芳草亭觀草

鬪春堂牡丹芍藥

宜

雨亭千葉海棠

艷香館林檎

花院紫牡丹

宜

雨亭北黃薔薇

現樂堂大花

花院賞煮酒

瀛

巒勝處山花

經寮鬪茶

羣仙繪幅樓芍藥

本草綱目

采浮萍草

浮萍草三月采淘三五次窰二五日焙爲末不得見
日凡大風癘疾每服三錢食前溫酒下常持觀音聖

號忌猪魚雞蒜

酌中志略

宮中三月

三月初四日宮眷內臣換穿羅衣

直隸志書

各省風俗同者不載

宛平縣

三月二十八日東嶽誕辰太常寺致祭民間多結香會盛陳鼓樂旗幢前導亦有裝小兒為故事名臺閣者以彰祭祀之儀觀者夾路

良鄉縣

三月二十八日祭賽城隍

香河縣

三月二十八日男婦往東嶽廟進香謂之賽廟演戲數日乃止

通州

三月二十八日俗尚拜廟凡有疾病者或於城隍或於東嶽發愿於是日拜廟具牲醴頂紙馬斂衣束身自家門拜起及廟而止

昌平州

季春月游人遍郊原命曰游春多於龍泉山大松園
兩處婦女為鞦韆戲

懷柔縣

二月清明以前種者曰風生清明以後種者曰雨生
又俗云此時為苦春頭每候榆柳芽發採以代穀

房山縣

三月二十八日留臺尖三官廟會

薊州

三月用牲醴祈年於社廟

永平府

季春月朔占值清明草木榮茂值穀雨黍稷豐盛是
日及次日雨主旱三日屋地不平取土墊之吉種宜
葫蘆多且大也十四日俗稱城隍神生日競設賽焉
或有夜祭三皇享胙瞽者唱飲達旦下旬八日祀東
嶽廟俗為大帝誕辰也男婦有為父母兄弟賽願頂
紙馬斂衣束身出戶且行且拜親眾鼓吹隨及廟乃
止並曰拜廟山海則拜於天妃廟穀雨書朱符禁蝎

古今圖書集成
又占月初三四見新月語日月兒張弓少雨多風月兒仰瓦不求自下爲甚驗焉

清苑縣

三月十五日祀劉守真君廟泛舟南浦

雄縣

季春俗占一二日雨主旱

深澤縣

三月時杏桃李花俱開挈榼具就樹下酌酒曰尋芳

肅寧縣

占雨三月初一初二雨典莊賣兒女初三初四雨牆頭摸鯉魚初五初六吃酒饜肉初七初八飲酒插花

任丘縣

穀雨栽蓮

青縣

三月三日祀三皇廟

慶雲縣

穀雨書符曰辰逢穀雨商山伯莫教青奴枕上來婦女理蠶占候三月初一初二雨主歲饑是月終作玫

古今圖書集成
禮典典

瑰餅

饒陽縣

三月三日聽蛙聲午前鳴高田熟午後鳴低田熟唐詩云田家無五行水旱卜蛙聲十一日麥生日朔日風雨主民疾蟲生晦日雨主麥不熟穀雨東風主蠶黑死南風主廣收田西風主田多收北風主角田災

內丘縣

三月朔至望官府祭神頭鵲王廟後后土神女相稱西頂娘娘四方進香祀禱者數百里

宣府鎮

三月二十八日東嶽帝誕辰傾城士女踵詣行宮酬願拈香奠觴獻果或焚誦祈祥或鎖杻謝罪竟日乃罷

山東志書

蒲臺縣

三月十五日進香於烟火臺

兗州府

穀城山一名黃山山巔有石巋然數丈其色正黃故

古今圖書集成
日黃石史記黃石公出一編書授張良曰讀是則爲王者師後十三年見我濟北穀城山下黃石卽我也他日良於山下果得黃石祀之後人立祠歲以三月十八日致祭

城武縣

三月二十六日文亭山大會鄰封商賈數百里外皆輻輳焉

濟寧州

穀雨試茶

丘縣

三月十八日祀成湯廟二十三日祀城隍廟演劇婦人皆請香諸貨列如林熙熙攘攘一勝會也

山西志書

太谷縣

三月十七日鳳凰山空王佛會男女絡繹登陟其上游覽會樂鄰境亦有至者

孟縣

三月初一日起鄉賽至月盡止祈穀食

夏縣

三月十八日祀后土聖母廟祈報嗣息二十二日祀禹廟二十八日享賽太山神廟

隰州

三月二十八日南關東嶽廟會各村龍王俱迎至殿上遠近畢集三日迎回婦女是日於嶽殿西廊子孫娘娘廟進香

黎城縣

三月種粟豆藍茄麻子紅花收榆子育蠶

廣靈縣

三月十七日遠近男女負戴香楮登千福北嶽神祠拜禱祈嗣

河南志書

儀封縣

三月一日士女赴棘針園禱祀設醮

陳州

三月十五日洪山廟會遠近皆來祭以神司六畜之命也二十八日城隍廟會士民辦香楮奠獻各色貨

玩雲集道傍交易一日

輝縣

風神廟在縣西北黃水口崖傍有穴風自內出人以
瓦石投之踰時迅猛大作每歲季春有司祭禱

鞏縣

三月十三日合縣爲玉仙社相傳玉仙司中天風雨
士民登山祈禱無不響應故每年著爲水社城市村
舍皆合衆登山刻爲瓊臺寶座幡幢旗幟侍從儀衛
若王者然考鼓鳴鏞雷轟地震禮玉仙求雨還則無

不滂沱卽設像祭賽焉十八日爲中嶽社其幡幢侍
從儀衛與水社同

信陽州

三月十五日朝堅山磴道盤紆嶢峭幾于武當

固始縣

季春之月貧民取榆莢槐柳椿芽烹以供食占法二
日雨主旱

陝西志書

白水縣

古今圖書集成
三月十八日士女出城祀后土廟祈嗣

岐山縣

三月十五日六坊民輪祭孤魂蓋在城厲祭之遺也
相傳黃巢作亂多殺傷祭則年豐

平涼府

三月馬始宦花序開麥始節六畜修孕大孕鳥大訛
魚孕椿芽刺椿苦菜登農大播秋種耨麥植茄瓜瓠
韭苜蓿及壓桑蒲萄榴枝羊剪毛土旺種秋豆桑芽
蠶始生

江南志書

高淳縣

三月初旬邑中迎天將以人代爲像飾假面作鬼神
狀用鼓樂旗蓋導引跳舞周舞衢巷傾動遠邇親戚
聚觀宴飲之費復不可量官欲禁止則人皆洶洶謂
必致大疫蓋亦鄉儻之遺意 咎村曹塘祠張菩薩
三月中旬拜許香愿其費不貲至有以身禱插刀於
臂繫鎖於頸祭畢出其刀不創亦不痛云

長洲縣

三月喜晴麥乃有秋諺云二月溝底白莎草變成麥
常熟縣

三月二十八日東嶽天齊帝誕日各廟神齊赴恍似
人間頌祝華軒綵仗爭奇炫麗豪門必爭致而觀之
比年亦稍衰息惟城隍神社會如故

嘉定縣

三月十一日為麥生日喜晴二十八日為東嶽天齊
聖帝生辰其行宮在江灣鎮者最盛清明前後十餘
日士女拈香闖塞塘路樓船野舫充滿溪河附近村

坊各以船載楮帛鳴金張幟交納廟內堆積如山名
曰解錢糧又有買賣趕趁貨物戲具及開場賭博鄉
城畢集 三月天多雨黃沙是年食麥者多嘔黑沙
不害沙即霾也土人謂之落沙

崇明縣

三月二十八日城隍神解黃錢至東嶽廟

松江府

三月十一日麥生日喜晴此月無雨麥乃有秋二十
八日載歌嘍游禮于山嶽祠東鄉諸巫者自元日後

古今圖書集成
昇偶神循門互唱索錢結縷爲勝以奉嶽神謂之錢
幡會至是日鼓樂騎蓋送神上山而散

無錫縣

三月二十八日齋辦香而走東嶽廟者數縣畢至村
姬市媪扶攜交錯其夕遂止廟中謂之坐夜數日之
間寺塘涇爲之壅塞

懷寧縣

穀雨日俗多以此日採茶名穀雨茶又有布穀鳥鳴
其聲在夏前則曰百草發科遲數日則曰蠶老作窠

立夏後則曰割麥插禾音語彷彿似之田家每因時
以起農事

徽州府

三月風而雨土爲霾傷麥浴穀子採新茗

休寧縣

穀雨占禾麥溫煖生秧風寒養麥

巢縣

三月初一至初二作神會卽儺禮也每方各裝扮大
神一尊鬼使四驅導之皆面戴傀儡規神鬼制各異

古今圖書集成
擇長大者扮大神衣神衣袞冕導者曰探子彩服奇飾指揮顧盼左右盤辟且行且止大神則步履莊嚴座隨其後行不數武端坐儼然頃復起行各方之神會于一衢多至十二尊少或六七尊聚觀者塞道

浙江志書

嘉興府

三月十八日龍湫山與吳之陽山多雲霧雷雨俗傳爲白龍生日

孝豐縣

穀雨撒穀種燠蠶子祀竈采茶清明後數日爲蠶月禁往來省視使育蠶閱月繭成治絲

紹興府

三月五日俗傳禹生之日禹廟遊人最盛無貧富貴賤傾城俱出土民皆乘畫舫丹堊鮮明酒樽食具甚盛賓主列坐前設歌舞小民尤相矜尚雖非富饒亦終歲儲蓄以爲下湖之行春欲盡數日遊者益衆千秋觀前一曲亭亦競渡不減西園至立夏日止三月二十八日東嶽神誕日蕭山之蒙山餘姚之黃山

皆有廟焉自十六日起男女競往燒香羅拜有自家門出且行且拜直至廟者巨戶婦女或不能行且拜則雇人代拜大姓皆樓船載簫鼓至廟拜禱卽不拜禱亦鳴榔遊飲姚人謂之遊江至月終乃止

諸暨縣

三月十六日驗晴雨審稠桑之貴賤

餘姚縣

三月二十八日東嶽生日自十二日至二十日禮拜之會分爲數十社每社數十百人鳴金曳幟而唱佛

號邑中叢祠無不遍至婦女亦於此時燒香入廟人衆聚觀通國若狂

蘭谿縣

三月十五日邑之上市有忠祐廟俗傳是日爲廟神生日衆作鼇山等項與二月二日同

常山縣

三月哉生明祠各出其神以朝於冲虛之宮以祈靈雨元帝爲主元帝者元冥雨師也夜則有鐵簡之會

龍泉縣

三月初一日風雨人民多病其日值清明竹木再榮其日值穀雨大豐大雷雨主旱月內有蝕米貴人饑月內無三卯麻麥熟月內虹主米貴魚鹽大貴月內辰日雨百蟲生未日雨百蟲死初五日陰雨主蠶收百倍是月行冬令國有大恐行夏令主瘟疫

江西志書

武寧縣

俗傳春盡有黃丹瘴則損麥

寧州

俗稱三月為李花寒

都昌縣

三月朔日居民市酒豕祭神禳災祈福

湖口縣

三月二十四日市民奉迎境內東嶽廟諸神各肖神面戴之游於市中民間童男女及成人有疾祈保者隨拜其後至迎春門外行宮安置二十七日返廟謂之迎社戶

新城縣

穀雨採茶葉名為穀雨先春

廣昌縣

三月七日宜雨諺云二月初七要雨不得雨四月初八要晴不得晴

瀘溪縣

三月寒退多風雨始插秧穀雨求嗣者多於是日集僧作佛供名曰穀雨供取生育之義

瑞州府

三月二十九日郡城諸神迎入東嶽廟宴享綵亭錦

帳鬪巧爭奇繁費不貲

湖廣志書

崇陽縣

三春之月迎儺神演戲凡儺一夜釀錢糜費謂之還香火其神即周禮方相氏之意而奉行非也是月市中建春醮祀張巡其費亦如儺

雲夢縣

穀雨日老漁祝雨雨則魚繁育

寶慶府

古今圖書集成
三月晦日飲酒謂之送春

新田縣

三月田家採木葉置田中肥田多種綿花種後二三日方雨則草死而綿盛

福建志書

建安縣

三月有青草瘴

仙遊縣

三月晦夜多醪金暢飲擊鼓狂歌至有負擔頭走大

道嗶嗶然作采菱音也謂之開鼓聲或曰畱春

詔安縣

海上颶信三月初三日爲元帝颶十五日爲真人颶二十三日爲媽祖颶三月共三十六颶此其大者真人颶多風媽祖颶多雨

海澄縣

三月十五日青礁慈濟宮吳英惠侯誕侯名本生于宋太平興國四年以神醫特廟澄人禋祀幾徧問劑採草日無休晷先數日各祀廟建醮醮畢迎神趣慈

濟宮方言曰割香神有言乃附昇者忽披髮蹀跣如空中行道官集棘刺爲毬使上拂雲根而承以背脊復引錐貫頰及臂又交劍衡木仰其銜以受踏數人昇而挺立不傷無害則真神矣其方言曰銅身社人乃噉鼓樂旌幟樓閣彩亭前導至祖宮傳香以歸歲以爲常歸入門衣有寸塵額有符籙翁媪妻子女喜繞旋旋爲割得香來也是月也蕞爾青礁漳泉香車四方商旅外國珍異三代八朝之骨董南北梨園之歌謳貨隨隊分人無聲辨市不及塵枕不及夢今廟忽救藥未遑問舍也

廣東志書

始興縣

三月梅熟

歸善縣

三月二十七日郡中有所祈禱者皆會衆自元妙觀沿街拜至東嶽宮裝扮雜戲爲樂

長樂縣

古今圖書集成
季春之月苦菜秀榴花開楊梅枇杷熟蛙鳴農時早
苗種薯芋更裘以葛

化州

三月十日爲朝拜會爲首者先一月預告於康車二
神諸有願者擇能敬之人爲朝拜弟子戴五岳巾穿
青袍束腰帶執香爐魚貫而行迎駐靜處次晨鷄鳴
照前迎導一人仰天高喚拜號衆弟子同聲和之一
步一唱沿途而拜謂之路拜經有願者及爲會首者
門當道設供不入其家謂之路醮如是者三日乃散

廣西志書

隆安縣

三月桐始華粟日蕃早禾秀穀種盡播撒芝麻鹿角
解蟬擁噪民急于犁修田功以待稼

雲南志書

南安州

三月二十八日馭從馬以五綵花繒爲飾

鶴慶府

峰頂山在城東十七里翠嶺處有佛祠郡人以歲三

季春部藝文二 詩

時運 四首

晉陶潛

晚春

梁簡文帝

惜晚春應劉祕書

江淹

春暮喜晴酬袁戶曹苦雨

何遜

晚春宴

北齊韋道遜

春晚

蕭愨

春日

陽休之

晚春

隋煬帝

春晚宴兩相及禮官麗正殿學士探得風字

唐元宗

暮春喜雨詩

文宗

三月二十日詔宴樂遊園

張說

晚春歸思

王維

奉和聖製暮春送朝集使歸郡應制

前人

晚春嚴少尹與諸公見過

前人

晚春送吉校書歸楚州

李嘉祐

暮春

杜甫

絕句漫興

九首

前人

闕題

前人

卽事

前人

晚春末寧墅小園獨坐寄上王相公

錢起

暮春歸故山草堂

前人

季春

嚴維

春晚賦得餘花落

李益

春晚游鶴林寺寄使府諸公

李端

三月

杜奕

陌上暮春

武元衡

寓興呈崔員外諸公

前人

三月晦日會李員外座中頻以老大不醉見譏

因有此贈

令狐楚

晚春

韓愈

送春詞

劉禹錫

郡齋三月下旬作

崔護

遣春 八首

元稹

晚春

前人

殘春曲

白居易

春末夏初閑遊江郭

前人

春日閒居

前人

春夜宿直

前人

三月二十日醉中留別

前人

三月二十八日贈周判官

前人

三月三十日題慈恩寺

前人

三月五日泛長沙東湖

張又新

江南暮春寄家

李紳

殘春獨來南亭因寄張祜

杜牧

春晚題韋家亭子

前人

三月十日流杯亭

李商隱

春深脫衣

前人

春暮對雨

劉得仁

晚春花

項斯

惜春

薛能

三月晦日送客

崔櫓

暮春對花

前人

三月晦日贈劉評事

賈島

惜春詞

溫庭筠

三月十八日雪中作

前人

對殘春

劉滄

送春

高駢

三月盡日

李昌符

送春

李咸用

長安惜春

羅鄴

惜春

前人

春盡

韓偓

春晝

前人

和人春暮書事寄崔秀才

韋莊

暮春日宴溪亭

成彥雄

春殘

翁宏

粉牋題詩

無名氏

宮詞 二首

花蕊夫人徐氏

春晚綠野秀

宋王禹偁

提舉端明見示三月晦日雨中書懷詩次韻

文彥博

暮春

余靖

暮春有感

歐陽修

三月吟

邵雍

南園賞花 二首

前人

花時阻雨不出

前人

問春

前人

暮春

前人

春遊

前人

春盡後園閒步

前人

春去吟

前人

半山春晚即事

王安石

暮春

前人

晚春

韓維

送春示友人

蘇軾

三月二十九日 二首

前人

春晚樓上

賀鑄

次韻宋楙宗三月十四日到西池都人盛觀翰

林公出遊

黃庭堅

三月晦日

秦觀

晚春

張耒

暮春

前人

次韻庭玉弟暮春作

李昭玘

暮春

謝邁

三月十日遊報國院小軒頗幽勝為名曰雙清

仍書此詩

朱松

三月晦到大庾

張九成

暮春上塘道中

范成大

三月四日驟暖

前人

春晚

前人

山家暮春

陸游

春晚

前人

三月十日

楊萬里

三月廿七日送春

前人

晚春卽事

前人

三月晦日與諸兄爲率真之約徘徊石馬晚集
保福偶成短句奉呈聊發一笑

朱熹

春晚呈范石湖

劉翰

暮春

錢時

晚春

宋伯仁

春晚郊行

吳龍翰

三月晦日

真桂芳

深春

王鎡

二首

柳塘送春

葛長庚

春晚

釋道潛

晚春會東園

媛朱淑真

三月

元劉秉忠

春晚雜興

方回

四首

應教和咏人

趙孟頫

暮春用唐壽卿韻

曹伯啓

京城春暮

薩都刺

晚春

周權

次晚春韻

李孝光

春暮

明周憲王

春深即事

錢宰

春暮吟

郭鈺

暮春書事

瞿佑

春晚漫成

劉溥

春日應制

王鏊

暮春 二首

文徵明

暮春初過山莊

李先芳

陽春曲

李奎

三月三十日

汪道貫

三月四日即景

李禎

歲功典第三十四卷

季春部藝文一

旄城門銘

後漢李尤

旄門值季位月在辰順陽布惠貧乏是振

晚春賦

梁簡文帝

待餘春於北閣藉高燕於南陂水篩空而照底風入
樹而香枝嗟時序之迴幹歎物候之推移望初篁之
傍嶺愛新荷之發池石憑波而倒植林隱日而橫垂
見遊魚之戲藻聽驚鳥之鳴雌樹臨流而影動巖薄

古今圖書集成
暮而雲披既浪擊而沙游亦苔生而徑危

姑洗三月啓

昭明太子

伏以景逼徂春時臨變節啼鶯出谷爭傳求友之音
翔藥飛林競散佳人之鱖魚游碧沼疑呈遠道之書
燕語雕梁狀對幽閨之語鶴帶雲而成蓋遙籠大夫
之松虹跨澗以成橋遠現美人之影對茲節物寧不
依然敬想足下聲馳海內名播雲間持郭璞之毫鸞
詞場月白吞羅含之彩鳳辯囿日新某山北逸人牆
東隱士龍門退水望冠冕以何年鷁路頽風想簪纓

於幾載既違語默且阻江湖聊寄八行之書代申千
里之契

季春下旬詔宴薛王山池序

唐張說

有生之微萬殊無方之感一節陽和而動植暢春滿
而臯壤悅后皇所以發時令布新慶二南邁周召之
風百辟形金石之誅者也碧樓日暖青山雪殘首獻
歲之浹辰尾暮春之提日帝京形勝借山林而入游
戚里池臺就修竹而開宴泉調御府味給天廚仙倡
侑樂中貴督酒太平佳事前史未書大矣哉一德日

古今圖書集成
新九功惟敘運璿樞而均四氣握金鏡而靜萬方堯
舜禹湯不違顏于咫尺夔龍伊呂共接武于朝廷不
可見而見焉不可聞而聞者豈深思勝殘去殺累百
年之至仁推曆按圖啓千齡之昌運河清難得人代
幾何擊壤之歡良有以也地卽集作此則青淄上路朱邸
平臺城烟屢起而汨山野風時來而過水春將悵別
愛落花之灑途夏如欣會玩峰雲之映沼爾其列筵
授几分曹設幕艇送江鳧船迎海鶴魚龍丸劍曼延
揮霍鸞鳳鳴簫鼓作申錫逾於百甓慈惠出于三爵

炮炙熏林塘醪醴厭丘壑抃急管于無筭醉湛恩以
取樂羣公賦詩俾僕題序長卿消渴覺含毫之轉遲
子雲壯集作老夫見雕蟲之都廢敢憚鄙詞之訥澀恐
貽盛集之蕪穢云爾

惜餘春賦

李白

天之何爲令北斗而知春兮迴指于東方水蕩漾兮
碧色蘭葳蕤兮紅芳試登高而望遠極雲海之微茫
魂一去兮欲斷淚流頰兮成行吟清風兮詠滄浪懷
洞庭兮悲瀟湘何予心之縹緲兮與春風而飄揚思

飄揚兮無限念佳期兮莫展平原萋兮綺色愛芳草
兮如剪惜餘春之將闌每爲恨兮不淺漢之曲兮江
之潭把瑤草兮思何堪想遊女于峴北愁帝子于湘
南恨無極兮心氤氳日眇眇兮憂紛紛披衛情于淇
水結楚夢于陽雲春每歸兮花開花已闌兮春改歎
長河之流春送馳波于東海春不畱兮時已失老衰
颯兮情逾疾恨不得挂長繩于青天繫此西飛之白
日若有人兮情相親去南越兮往西秦見遊絲之橫
路網春暉以畱人沈吟兮哀歌躑躅兮傷別送行子

之將遠看征鴻之稍滅醉愁心于垂楊隨柔條以糾
結望夫君兮咨嗟橫涕淚兮怨春華遙寄影于明月
昔送君於天涯

春儺賦

孫頴

是月也見斗於辰日交長至有司方成大禮展時事
達九門以磔禳協四靈而滌器匪歲之卒乃春之季
令陰氣以下降使陽和而上利順三時而不忒協萬
福而必萃命方相氏出儺百神丹首纏裳辮髮文身
縱金鼓以騰躍執戈矛以逡巡驅赤疫於四裔保皇

古今圖書集成
家於萬人斯乃卒歲之儺也豈比夫抑而畢春於是
休徵允備有典有則洗滌氛癘祚我邦國其弓乃桃
其矢乃棘野仲無以施其計遊光曷足逞其特然而
禮法肅設干旌駢羅祠青帝以邀福抑金方以與儺
將以窒陰氣發陽和已矣哉斯欲陳儺之儀述儺之
飾盛可以仰功可以抑騰金耀於四日被熊皮於五
色乍煒煒以煌煌或昉昉而赧赧既秉戈而揚盾率
百隸而是職及乎出未央經上林芳菲發越瑕穢漂
沉時令既畢嘉貺是尋黃龍白鳳大輅南金聚高冠
之岌岌會長劍之森森我皇堯舜比德夔龍是扶春
儺高門載馳載驅玉以制容金以飾途流聲教以布
濩乃洋溢於天衢旣而陰陽交和庶物時育氛氲將
掃祥光可掬綏我眉壽介余景福客有書劍三朝苦
心簡牘荏苒青衿蹉跎白屋儻不棄於芻蕘將刷羽
於喬木

季春部藝文二 詩

時運四首

時運游暮春也

晉陶潛

邁邁時運穆穆良朝襲我春服薄言東郊山滌餘霽
宇曖微霄有風自南翼彼新苗
洋洋平津乃漱乃濯邈邈遐景載欣載矚稱心而言
人亦易足揮茲一觴陶然自樂

延日中流悠悠青沂童冠齊業閒詠以歸我愛其靜
寤寐交揮但恨殊世邈不可追

古今圖書集成
斯晨斯夕言息其廬花藥分列林竹翳如清琴橫牀
濁酒半壺黃唐莫逮慨獨在予

晚春

梁簡文帝

紫蘭葉初滿黃鶯弄不稀石蹲還似獸蘿長更如衣
水曲文魚聚林暝鴉鳥飛渚蒲變新節巖桐長舊圍
風花落未已山齋開夜扉

惜晚春應劉祕書

江淹

烟景抱空意蘅杜綴幽心心憂望碧葉涵影顧青林
風光多樹色露華翻蕙陰水苔方下蔓石蘿日上尋

霞衣已具帶仙冠不待簪徒爲多委鬱精魄還自臨
始獲瓊歌贈一點重如金山中有雜桂玉瀝乃共斟

春暮喜晴酬袁戶曹苦雨

何遜

振衣喜初霽褰裳對晚晴落花猶未捲時鳥過餘聲
春芳空悅日游客反傷情鄉園不可見江水獨自清
願得同攜手歸望對都城

晚春宴

北齊韋道遜

日斜賓館晚風輕麥候初簷喧巢幕燕池躍戲蓮魚
石聲隨流響桐影傍巖疎誰能千里外獨寄八行書

春晚

蕭愨

春庭聊縱望樓臺自相隱
窻梅落晚花池竹開新笋
泉鳴知水急雲來覺山近
不愁花不飛到畏花飛盡

春日

陽休之

遲遲暮春日靄靄春光上
柔露洗金盤輕絲綴珠網
漸看階芭蔓稍覺池蓮長
蝴蝶映花飛楚雀綠條響

晚春

隋煬帝

洛陽春稍晚四望滿春暉
楊葉行將暗桃花落未稀
窺簷燕爭入穿林鳥亂飛
唯當關塞者溽露方霑衣

春晚宴兩相及禮官麗正殿學士探得風字

并序

唐元宗

朕以薄德祇膺歷數正天柱之將傾
紉地維之已絕故得承奉宗廟垂拱巖廊
居海內之尊處域中之大然後祖述堯典
憲章禹績敦睦九族會同四海猶恐烝黎
未乂徭戍未安禮樂之政虧師儒之道喪
乃命使者衣繡服行郡縣因人所利擇其
可勞所以便億兆也乃命將士擐介冑礪石
矢審山川之向背應歲月之孤虛所以靜
邊陲也乃命禮

古今圖書集成
官考制度稽典則序文昭武穆享天地神祇所以
申嚴潔也乃命學者繕落簡緝遺編纂魯壁之文
章綴秦坑之煨燼所以修文教也故能使流寓返
粉榆之業荒徼稱藩屏之臣神祇歆其禋祀庠序
闡其經術既家六合時巡兩京函秦則委輸斯遠
鼎邑則朝宗所利封畿四塞從來測景之都城闕
千門自昔交風之地陰陽代謝日月相推豈可使
春色虛捐韶華竝歇乃置旨酒命英賢有文苑之
高才有掖垣之良佐舉杯稱慶何樂如之同吟湛

露之篇宜振凌雲之藻於時歲在乙丑開元十三
年三月二十七日

乾道運無窮恆將人代工陰陽調曆象禮樂報元穹
介胄清荒外衣冠佐域中言談延國輔詞賦引文雄
野霽伊川綠郊明鞏樹紅冕旒多暇景詩酒會春風

暮春喜雨詩

開成元年三月
觀內人賽雨賦

文宗

風雲喜際會雷雨遂流滋薦幣虛陳禮動天實精思
漸侵九夏節復在三春時霖霖垂朱闕飄飄入綠墀
郊坰既霑足黍稷有豐期百辟同康樂萬方佇雍熙

三月二十日詔宴樂遊園

張說

樂遊形勝地表裏望郊宮北闕連天頂南山對掌中
皇恩貸芳月旬宴美成功魚戲芙蓉水鶯啼楊柳風
春光看欲暮天澤戀無窮長袖招斜日畱光待曲終

晚春歸思

王維

新妝可憐色落日卷羅幃鑪氣清珍簟牆陰上玉墀
春蟲飛網戶暮雀隱花枝向晚多愁思閑牕桃李時
奉和聖製暮春送朝集使歸郡應制

前人

萬國仰宗周衣冠拜冕旒玉乘迎大客金節送諸侯
祖席傾三省褰帷向九州楊花飛上路槐色蔭通溝
來預鈞天樂歸分漢主憂宸章類河漢垂象滿中州

統籤注云
重韻誤

晚春嚴少尹與諸公見過

前人

松菊荒三逕圖書共五車烹葵邀上客看竹到貧家
鵲乳先春草鶯啼過落花自憐黃髮暮一倍惜年華

晚春送吉校書歸楚州

李嘉祐

詩人饒楚思淮上及春歸舊浦菱花待閒門柳絮飛

古今圖書集成
高名鄉曲重少事道流稀定向漁家醉殘陽臥釣磯

暮春

杜甫

臥病擁塞在峽中瀟湘洞庭虛映空楚天不斷四時
雨巫峽常吹萬里風沙上草閣柳新闌城邊野池蓮
欲紅暮春鴛鴦立洲渚挾子翻飛還一叢

絕句漫興九首

前人

眼見客愁愁不醒無賴春色到江亭卽遣花開深造
次便教鶯語太丁寧

手種桃李非無主野老牆低還是家恰似春風相欺

得夜來吹折數枝花

熟知茅齋絕低小江上燕子故來頻銜泥點污琴書
內更接飛蟲打著人

二月已破三月來漸老逢春能幾迴莫思身外無窮
事且盡生前有限杯

腸斷春江欲盡頭杖藜徐步立芳洲顛狂柳絮隨風
舞輕薄桃花逐水流

嬾慢無堪不出村呼兒日在掩柴門蒼苔濁酒林中
靜碧水春風野外昏

古今圖書集成
糝徑楊花鋪白氈點溪荷葉疊青錢筍根稚子無人
見沙上鳧雛傍母眠

舍西柔桑葉可拈江畔細麥復纖纖人生幾何春已
夏不放香醪如蜜甜

隔戶楊柳弱嫋嫋恰似十五女兒腰誰謂朝來不作
意狂風挽斷最長條

闕題

前人

三月雪連夜未應傷物華只緣春欲盡畱著伴梨花

卽事

前人

暮春三月巫峽長晶晶行雲浮日光雷聲忽送千峯
雨花氣渾如百和香黃鶯過水翻迴去燕子銜泥濕
不妨飛閣捲簾圖畫裏虛無只好對瀟湘

晚春永寧墅小園獨坐寄上王相公

錢起

東閣一何靜鶯聲落日愁夔龍暫爲別昏旦思兼秋
蕙草出籬外花枝寄竹幽上方傳雅頌七夕讓風流

暮春歸故山草堂

前人

谷口殘春黃鳥稀辛夷花盡杏花飛始憐幽竹山窗

古今圖書集成
下不改清陰待我歸

季春

嚴維

江南季春天
萼葉細如弦
池邊草作逕
湖上葉如船
春晚賦得餘花落

李益

畱春春竟去
春去花如此
蝶舞遶應稀
鳥驚飛詎已
衰紅辭故萼
繁綠扶彫藥
自委不勝愁
庭風那更起

春晚游鶴林寺寄使府諸公

李端

野寺尋春花已遲
背巖惟有兩三枝
明朝攜酒猶堪
醉爲報春風且莫吹

三月

杜奕

憶長安三月時
上苑遍是花枝
青門幾場送客
曲水竟日題詩
駿馬金鞭無數
良辰美景追隨

陌上暮春

武元衡

青青南陌柳如絲
柳色鶯聲晚日遲
何處最傷游客
思春風三月落花時

寓興呈崔員外諸公

前人

三月楊花飛滿空
飄飄十里雪如風
不知何處香醪
熟願醉佳園芳樹中

古今圖書集成
三月晦日會李員外座中頻以老大不醉見譏
因有此贈
令狐楚

三月唯殘一日春玉山傾倒白鷗馴不辭便學山公
醉花下無人作主人

晚春

韓愈

草樹知春不久歸百般紅紫鬪芳菲楊花榆莢無才
思惟解漫天作雪飛

送春詞

劉禹錫

昨來樓上迎春處今日登樓又送歸蘭葉殘妝含露

泣柳條長袖向風揮佳人對鏡容顏改楚客臨江心
事違萬古至今同此恨無如一醉盡忘機

郡齋三月下旬作

崔護

春事日已歇池塘曠幽尋殘紅披獨墜嫩綠間淺深
偃仰捲芳褥顧步愛新陰謀春未及竟夏初遽見侵

遣春八首

元稹

曉月籠雲影鶯聲餘霧中暗芳飄露氣輕寒生柳風
冉冉一趨府未爲勞我躬因茲得晨起但覺情興隆
久雨憐霽景偶來隄上行空濛天色嫩杳森江面平

古今圖書集成
百草短長出衆禽高下鳴春陽各有分予亦澹無情
鏡皎碧潭水微波粗成文煙光垂碧草瓊脈散纖雲
岸柳好陰影風裾遺垢氛悠然送春日八荒誰與羣
低迷籠樹煙明淨當霞日陽燄波春空平湖漫疑溢
雪鷺遠近飛渚牙淺深出江流復浩蕩相爲坐紆鬱
暄寒深淺春紅白前後花顏色詎相讓生成良有涯
梅芳勿自早菊秀勿自賒各將一時意終年無再華
高屋童稚少春來歸燕多葺舊良易就新院亦已羅
俯憐雛化卵仰媿鵬無窠巢棟與巢幕秋風俱奈何

撩亂撲樹蜂摧殘戀房蕊風吹雨又頻安得繫於綺
酒盃沈易過世事紛何已莫倚顏似花君看歲如水
花陰莎草長藉莎閒自酌坐看鶯鬪枝輕花滿尊杓
葛巾竹梢挂書卷琴上閣沽酒過此生狂歌眼前樂
晚春
前人

晝靜簾疎燕語頻雙雙鬪雀動階塵柴扉日暮隨風
掩落盡閒花不見人

殘春曲

白居易

禁苑殘鶯三四聲景遲風慢暮春情日西無事牆陰

古今圖書集成
下閒蹋宮花獨自行

春末夏初閑遊江郭

前人

閒出乘輕屐徐行踏軟沙觀魚傍湓浦看竹入楊家
林迸穿籬筍藤飄落水花雨埋釣舟小風颺酒旗斜
嫩剝青菱角濃煎白茗茶淹畱不知夕城樹欲棲鴉

春日閒居

前人

是時三月半花落庭蕪綠舍上晨雞鳴窻間春睡足
春夜宿直

前人

三月十四夜西垣東北廊碧梧葉重疊紅藥樹低昂

月砌漏幽影風簾飄闇香禁中無宿客誰伴紫微郎

三月二十日醉中畱別

前人

春初攜手春深散無日花間不醉狂別後何人堪共
醉猶殘十日好風光

三月二十八日贈周判官

前人

一春惆悵殘三日醉問周郎憶得無柳絮送人鶯勸
酒去年今日到東都

三月三十日題慈恩寺

前人

慈恩春色今朝盡盡日裴回倚寺門惆悵春歸畱不

古今圖書集成
得紫藤花下漸黃昏

三月五日泛長沙東湖

張又新

上已餘風景芳辰集遠垌湖光迷翡翠草色醉蜻蜓
鳥弄桐花日魚翻穀雨萍從今留勝會誰看畫蘭亭

江南暮春寄家

李紳

洛陽城見梅迎雪魚口橋邊雪送梅劍水寺前芳草
合鏡湖亭上野花開江鴻斷續翻雲去海燕差池拂
水回想得心知寒食近潛聽喜鵲望歸來

殘春獨來南亭因寄張祜

杜牧

暖雲如粉草如茵獨步長堤不見人一嶺桃花紅錦
斲半谿山水碧羅新高枝百舌猶欺鳥帶葉棠梨獨
送春仲蔚欲知何處在苦吟林下拂詩塵

春晚題韋家亭子

前人

擁鼻侵襟花草香高臺春去恨茫茫
薦紅半落平池晚曲渚飄成錦一張

三月十日流杯亭

李商隱

身屬中軍少得歸木蘭花盡失春期
偷隨柳絮到城外行過水西聞子規

春深脫衣

前人

睥睨江鴉集堂皇
海燕過減衣憐蕙
若展帳動煙波
日烈憂花甚風長
奈柳何陳遵容易
學身世醉時多

春暮對雨

劉得仁

春暮雨微微翻疑
墜葉時氣蒙楊柳
重寒勒牡丹遲
未夕鳥先宿望晴
人有期何當廓陰
閉新暑竹風吹

晚春花

項斯

陰洞日光薄花開
不及時當春無半
樹經晚足空枝
疎與香風會細將
泉影移此中人到
少開盡幾人知

惜春

薛能

花開亦花落時節
暗中遷無計延春
日可能畱少年
小叢初散蝶高柳
卽聞蟬繁豔歸何
處滿山啼杜鵑

三月晦日送客

崔櫓

野酌亂無巡送君
兼送春明年春色
至莫作未歸人

暮春對花

前人

病香無力被風欺
多在青苔少在枝
馬上行人莫回首
斷君腸是欲殘時

三月晦日贈劉評事

賈島

古今圖書集成
三月正當三十日風光別我苦吟身共君今夜不須
睡未到曉鐘猶是春

惜春詞

溫庭筠

百舌問花花不語低迴似恨橫塘雨蜂爭粉蘂蝶分
香不似垂楊惜金縷願君畱得長妖韶莫逐東風還
蕩搖秦女含嚔向煙月愁紅帶露空迢迢

三月十八日雪中作

前人

芍藥薔薇語早梅不知誰是豔陽才今朝領得東風
意不復饒君雪裏開

對殘春

劉滄

楊花漠漠暗長隄春盡人愁鳥又啼鬢髮近來生處
白家園幾向夢中迷霏微遠樹荒郊外牢落空城夕
照西唯有年光堪自惜不勝煙草日萋萋

送春

高駢

水淺魚爭躍花深鳥競啼春光看欲盡判卻醉如泥

三月盡日

李昌符

江頭從此管絃稀散盡游人獨未歸落日已將春色
去殘花應逐夜風飛

送春

李咸用

四時爲第一一歲一重來好景應難勝餘花虛自開
相思九個月信得數枝梅不向東門送還成負酒杯

長安惜春

羅鄴

千門共惜放春迴半鎖樓臺半復開公子不能畱落
日南山遮莫倚高臺殘紅似怨皇州雨細綠猶藏畫
蠟灰畢竟思量何足歎明年時節又還來

惜春

前人

燕歸巢後卽離羣吟倚東風恨日曛一別一年方見

我游來游去不禁君鶯花御苑看將盡絲竹侯家亦
少聞獨坐南樓正惆悵柳塘花絮更紛紛

春盡

韓偓

惜春連日醉昏昏醒後衣裳見酒痕細水浮花歸別
澗斷雲含雨入孤村人間易得芳時恨地迴難招自
古魂慚愧流鶯相厚意清晨猶爲到西園

春晝

一作
盡

前人

春融豔豔大醉陶陶漏添遲日箭減良宵藤垂戟戶
柳拂河橋簾幕燕子池塘百勞膚清臂瘦衫薄香銷

古今圖書集成
楚殿衣窄南朝髻高河陽縣遠清波地遙絲纏露泣
各自無慘

和人春暮書事寄崔秀才

韋莊

半掩朱門白日長晚風輕墮落梅妝不知芳草情何
限只怪游人思易傷纔見早春鶯出谷已驚新夏燕
巢梁相逢只賴如澠酒一曲狂歌入醉鄉

暮春日宴溪亭

成彥雄

寒食尋芳遊不足溪亭還醉綠楊煙誰家花落臨流
樹數片殘紅到檻前

春殘

翁宏

又是春殘也如何出翠幃落花人獨立微雨燕雙飛
寓目魂將斷經年夢亦非那堪向愁夕蕭颯暮蟬輝

粉牋題詩

無名氏

三月江南花滿枝風輕簾幕燕爭飛游人休惜夜秉
燭楊柳陰濃春欲歸

宮詞

花藥夫人徐氏

三月金明柳絮飛岸花堤草弄春時樓船百戲催宣
賜御輦今年不上池

古今圖書集成
又

三月櫻桃乍熟時
內人相引看紅枝
回頭索取黃金
彈遶樹藏身打雀兒

春晚綠野秀

宋王禹偁

雨過川原上凝眸
送晚春韶光銷欲盡
野色望來新
天末逢藍嶂江湄亂
麴塵垂楊難認影
幽鷺莫藏身
遠接天開幕晴和草
展茵明時四郊靜
凌亂踏青人
提舉端明見示三月晦日雨中書懷詩次韻

文彥博

春光垂欲盡夏景漸增添
鬱鬱松篁茂蕭蕭風雨兼
花心隨絮落屐齒被苔黏
巧轉鶯遷木驚飛燕入簾
蝦鬚穿曲沼虎爪度前簷
坐久香銷炷吟多筆費尖
雲容方靄靄日色未炎炎
舞鶴傾丹頂游龜散綠髯
命賓常務率出令更須嚴
詩詠當階藥書尋傍架籤
蘭芬衣可襲露潤草俱沾
貴近辭金馬編修賜玉蟾
高歡惟自適獨樂未嘗厭
赤白曾諮丙丹青每誚閤
沖和緣養浩寂寞爲安恬
身處貧無愧心貪道不廉
成文推大手濟用鄙輕縑
視履循清節祈恩陋雜占

聞韶欣鳳舞在藻愛魚潛鱸膾思漁艇貂冠望酒帘
聖時非吏隱賢業繫民瞻撫事惟公論摛辭乃自謙
保躬誠易退康世義難淹累句慚無取酬言幸不嫌

暮春

余靖

草帶全鋪翠花房半墜紅農家榆莢雨江國鯉魚風
堤柳綿爭撲山櫻火共烘長安少年客不信有衰翁

暮春有感

歐陽修

幽憂無以銷春日靜愈長薰風入花骨花枝午低昂
往來採花蜂清蜜未滿房春事已爛熳落英漸飄揚

蛺蝶無所爲飛飛助其忙啼鳥亦屢變新音巧調簧
游絲最無事百尺拖晴光天工施造化萬物感春陽
我獨不知春久病臥空堂時節去莫挽浩歌自成傷

三月吟

邵雍

滿城盡日行春去言會行春還有數真宰何嘗不發
生游人其那無憑據梨花著雨漫成啼柳絮因風爭
肯住一片清明好意多奈何意好難分付

南園賞花二首

前人

三月初三花正開閒同親舊上春臺尋常不醉此時

古今圖書集成
醉更醉猶能舉大杯

花前把酒花前醉醉把花枝仍自歌花見白頭人莫
笑白頭人見好花多

花時阻雨不出

前人

三月洛陽春半時鞦韆未拆楊花飛小車不出閒春
泥亂紅翻處流鶯啼

問春

前人

三月春歸畱不住春歸春意難分付凡言歸者必歸
家爲問春家在何處

暮春

前人

春來小圃弄羣芳誰爲貧居富貴鄉門外柳陰浮翠
潤階前花影溜紅光梁間新燕未調舌天末歸鴻已
著行自問心源無所有答云疎嬾味偏長

春遊

前人

三月牡丹方盛開鼓聲多處是亭臺車中遊女自笑
語樓下看人間往來積翠波光搖帳幄上陽花氣撲
樽壘西都風氣所宜者草木空妖誰復哀

春盡後園閒步

前人

古今圖書集成
綠樹成陰日黃鶯對語時小渠初激灑新竹止參差
倚杖閒吟久攜童引步遲好風知我意故故向人吹

春去吟

前人

春去休驚晚夏來還喜初殘芳雖有在得似綠陰無

半山春晚卽事

王安石

春風取花去酬我以清陰翳翳陂路靜交交園屋深
牀敷每小息杖屨或幽尋惟有北山鳥經過遺好音

暮春

前人

春期行晼晚春意賸芳菲曲水應修禊披香未試衣

雨花紅半墜煙樹碧相依悵望夢中地王孫底不歸

晚春

韓維

春暉東去月收弦却拂凝埃敞北軒幾曲雲屏空白
晝一簾花雨自黃昏庭蕪碧合陰蟲息窗對紅稀鬪
雀喧細憶舊歡都入夢習家池上子山園

送春示友人

蘇軾

夢裏青春可得追欲將詩句絆餘暉酒闌病客惟思
睡蜜熟黃蜂亦懶飛芍藥櫻桃俱掃地鬢絲禪榻兩
忘機憑君借取法界觀一洗人間萬事非

三月二十九日二首

前人

南嶺過雲開紫翠北江飛雨送淒涼酒醒夢回春盡
日閉門隱几坐燒香

門外橘花猶的皜牆頭荔子已爛斑樹暗草深人靜
處捲簾欹枕臥看山

春晚樓上

賀鑄

楊花吹復盡春色但茫茫獨立西樓上持情向夕陽
次韻宋林宗三月十四日到西池都人盛觀翰
林公出遊

黃庭堅

金絨繫馬曉鶯邊不比春江上水船人語車聲喧法
曲花光樓影倒晴天人間化物三千歲海上看羊十
九年還作遨頭驚俗眼風流文物屬蘇仙

三月晦日

秦觀

節物相催各自新痴心兒女挽畱春芳菲歇去何須
恨夏木陰陰正可人

晚春

張耒

睡足高簷春日斜碾聲初破小龍茶樓邊綠樹飛紅
盡春色牆陰老薺花

暮春

前人

夜雨輕寒拂曉晴牡丹開盡過清明
庭前落絮誰家柳葉裏新聲是處鶯
白髮生來如有信青春歸去更無情
便當種秫長成酒遠學陶潛過此生

次韻庭玉弟暮春作

李昭玘

小雨廉纖春欲歸桃花吹盡燕來遲
閉門却有宜人處簾幕陰陰睡起時

暮春

謝邁

晚雨牆東暗綠槐清陰庭院鎖莓苔
委階紅藥將春

去貼水青荷與夏來

三月十日遊報國院小軒頗幽勝為名曰雙清

仍書此詩

朱松

千峯收宿雨坐見空翠滴攜筇出城隅
試此腰脚力竹陰穿窈窕僧戶扣岑寂
小軒清樾底盤礴聊自適闐然見幽禽
百轉深投隙即此與晤歌絕勝眼前客
幽懷層冰結屬鼻不可釋忽如散春風
回首無處覓天遊失六鑿真觀了千息
乾坤鼎鼎中指馬坐可一不知雙清老
何者為心迹持問跣趺人首肯復面壁

古今圖書集成
山烟明欲合歸舸兀深碧此心除溪月炯炯誰復識

三月晦到大庾

張九成

我登超然臺積雨久不止臺下柳成行掩映盈塘水
環塘率喬木倒影弄清泚恍如在故鄉西湖古寺裏
氣象極幽深景物盡蒼翠十年勞夢想一夕居眼底
獨坐不能去頽然起深思鐘鳴主人歸燭光何煒煒
笑語復移時夜久余當起歸路夫何如江聲寒玉碎

暮春上塘道中

范成大

客舍無煙野水寒競船人醉鼓闌珊石門柳絮清明

市洞口桃花上巳山飛絮著人春共老片雲將夢晚
俱還明朝遮入長安道慚愧江湖釣手閒

三月四日驟暖

前人

日脚融晴晚氣暄睡餘初覺薄羅便如何柳絮沾泥
處暖似槐陰轉午天

春晚二首

前人

客去鉤窻詠小詩遊絲撩亂柳花稀微風盡日吹芳
草蝴蝶雙雙貼地飛

夕陽槐影上簾鉤一枕清風夢昔遊夢見錢塘春盡

古今圖書集成
處碧桃花謝水西流

山家暮春

陸游

遶屋清陰合綠堤綠草纖起蠶初放食新麥已磨鎌
苦筍先調醬青梅小蘸鹽佳時幸無事酒盡更須添

春晚

前人

雨足人家插稻秧蠶生鄰女採桑忙萬花掃迹春將
暮百草吹香日正長閒覓啼鶯穿北崦戲隨飛蝶過
東岡飄然且喜身強健不怪兒曹笑老彊

三月十日

楊萬里

纔看桃李錦成圍忽便園林綠作堆遠草將人雙眼
去飛花引蝶過牆來簿書節裏無多著懷抱朝來得
好開已是七分春去了何須鳥語苦相催

三月廿七日送春

前人

只餘三日便清和儘放春歸莫恨他落盡千花飛盡
絮畱春不住欲如何

晚春卽事

前人

尺許新條長杏栽丈餘斑筍出牆隈浪愁草草酴醿
過不道婷婷芍藥來

古今圖書集成
三月晦日與諸兄爲率真之約徘徊石馬晚集
保福偶成短句奉呈聊發一笑
朱熹

春服明朝換晴川漲綠陰追隨皆勝侶邂逅卽初心
社蹟莓苔古禪扉竹樹深移尊真惜日畢景共披襟
儉德遵賢範哇詞愧雅音清和應更好逸想寄雲岑

春晚呈范石湖

劉翰

風日蕭蕭兩鬢華倦尋銀筆賦餘霞五更枕上無情
雨三月風前薄命花春困有時因病酒客懷何日不
思家年來事事心情嬾惟有歸耕策最嘉

暮春

錢時

園林深處綠成堆更著松陰一徑苔烟欲過牆風約
轉水將爭港石衝回斷雲收雨鳩呼婦嫩麥盈堤雉
應媒獨有殘紅春不管等閒飛入酒卮來

晚春

宋伯仁

風斃殘花滿地紅別離樽俎謾忽忽春心未肯收心
去却在茶蘼細影中

春晚郊行

吳龍翰

芒鞋竹杖出柴關簡點園林脚不閒翠幄初張花作

古今圖書集成
局錦棚成列筍爲班煙波鷗鷺春風外桑柘牛羊夕
照間野興不須邀客共芳尊濁酒對黃山

三月晦日

眞桂芳

九十春光能有幾東風遽作遠行人樽前莫惜今朝
醉明日鶯聲不是春

深春二首

王鎡

夾泥花上舊巢邊翠箔桑空蠶又眠天氣乍晴風候
別坐看盆藕出雙錢

燕子來時春又休暖風吹綠上枝頭繡簾不隔荼蘼

月香影無人自入樓

柳塘送春

葛長庚

急雨將雷過柳塘春因底事亦歸忙經時不放荷花
葉昨夜盡收梔子香判斷千林成夢去安排一夏納
風涼開眉無覓愁來處數筆晴雲畫水鄉

春晚

釋道潛

曉風池沼水瀾翻春盡淮南麥秀寒院落無人日亭
午柳花如雪滿闌干

晚春會東園

媛朱淑眞

古今圖書集成
紅疊苔痕綠滿枝舉杯和淚送春歸鷓鴣有意畱殘
景杜宇無情戀晚暉蝶翅落花盤地舞燕隨狂絮入
簾飛醉中曾記題詩處臨水人家半敞扉

三月

元劉秉忠

背陰花木錦成叢幽谷鶯啼上苑中李白桃紅楊柳
綠天涯無處不春風

春晚雜興四首

方回

豈有邪谿父老錢無朝無暮在樽前櫻桃豌豆分兒
女草草春風又一年

谿魚山筍佐新筍大勝長安上酒樓春老猶寒宿醒
困醱醺花下擁綿裘

城市塵埃不見詩西村東塢可尋誰夏前十日嘗新
麥正是江南最好時

芳草茸茸沒履深清和天氣潤園林霏微小雨初晴
處暗數青梅立樹陰

應教和味人

趙孟頫

春寒惻惻掩重門金鴨香殘火尚溫燕子不來花又
落一庭風雨自黃昏

古今圖書集成
暮春用唐壽卿韻

曹伯啓

一天晴碧日遲遲暑氣蒸人力自微幽徑雨餘芳草
合小園風急亂花飛臥思沂上歌詩去夢到山陰祓
禊歸還憶去年乘小駿西湖游罷北山圍

京城春暮

薩都刺

三月京城飛御花燕姬白馬小紅車旌旗日暖將軍
府絃管春深宰相家小海銀魚吹白浪層樓珠酒出
紅霞蹇驢破帽杜陵客獻賦歸來日未斜

晚春

周權

輕車繫吹尚紛紛袞袞香浮紫陌塵杜宇青山三月
暮桃花流水一溪雲東風旗旆亭中酒小雨闌干柳
外人何許數聲牛背笛天涯芳草正如茵

次晚春韻

李孝光

燕幕沉沉春晝永閒敲碁子小闌東拍天漲綠連朝
雨滿地殘紅昨夜風草際夢回詩有債柳邊寒薄絮
無功韶光暗換千年事莫遣閒愁著鬢中

春暮

明周憲王

九十春光似轉蓬半晴天氣霧溟濛一池新水今朝

古今圖書集成
雨滿地殘花昨夜風白髮自憐詩興在紅顏莫放酒樽空閒看青簡思今古得失由來一夢中

春深卽事

錢宰

露梢黃鳥啄來禽蛀葉青蟲絡樹陰又是綠階春雨歇滿庭芳草落花深

春暮吟

郭鈺

玉壺沽酒春絲絡啼鳥勸人滿杯酌落紅滿地暗香消濕翠如煙午陰薄畫樓玲瓏隔彩霞樓前雙鵲鳴呀呀想見吳帆北風起王孫明日當還家

暮春書事

瞿佑

睡起呼童掃落花石泉槐火試新茶樹林深處蜂王國簾幕陰中燕子家柳絮乘風投硯水竹枝搖影落窻紗幽居莫道無官況鼓吹猶存兩部蛙

春晚漫成

劉溥

重城楊柳晝沉沉坐久黃鸝轉夕陰幾處閒門芳草綠一簾微雨落花深年光暗覺隨流水春色長看滿上林故國松篁還似舊莫教奔走負歸心

春日應制

王鏊

奉天朝能曉曉曠曠勅使傳宣禦苑東好雨晴時三月
裏鑾輿遙過百花中東皇默運無言化南國新收不
戰功歸坐明堂還布德豫遊分與萬方同

春暮二首

文徵明

南風十日捲塵沙吹落牆根幾樹花老怯麥秋猶擁
褐病逢穀雨喜分茶庭陰寂歷梧桐轉簾影差池燕
子斜不是地偏車馬絕市喧不到野人家
林花落盡意蕭然舊喜圖書病亦捐宛轉閒愁如蔓
草蹉跎春事到啼鶻縈回淑氣游絲困亭午清陰碧

樹圓怪底叩門都不應北窻無事正高眠

暮春初過山莊

李先芳

山人本性愛山居弭節春游過草廬短砌雨餘芳草
合小亭風定落花初拂塵下榻驚梁燕開篋抽書走
壁魚更闢巖扉頻灑掃能無長者命巾車

陽春曲

李奎

三月江南春草芳水邊柳絲百尺長流鶯乍囀千金
堰紫燕雙棲文杏梁家家曲裏調鸚鵡處處簫聲引
鳳凰鳳凰臺上花爭發翡翠樓前鳥並翔別有藍橋

古今圖書集成
通蕙渚更憐斜峽接橫塘橫塘女兒多豔妝錦琴瑤
瑟爲誰張能歌白雪留人醉不管陽春斷客腸

三月三十日

汪道貫

已識青陽減其如白髮何風光愁裏失春事雨中過
藥裏妨鮭菜交遊問雀羅千林煙火少租吏正催科

三月四日卽景

李禎

忽忽春將暮俄過三月二草誰憐益母花自媚宜男
乍到尋巢燕初眠上箔蠶新茶與穉笋鄉味憶江南

